



## **Forum Beneficiale, Sive Quæstiones & Responsa Canonica**

Materiam De Beneficiis Universam Ex Beneficialistarum tam antiquorum, quàm recentiorum placitis complectentia. Opus methodo novâ, & clarâ in tres digestum Partes ... accuratè, ac copiosè instructae

De Vacatione, Amissione, Et Extinctione Beneficiorvm ...

**Leuren, Peter**

**Coloniæ Agrippinæ, 1704**

849. Specialiter, quid quòad auctorizandas permutationes poßit Vicarius generalis, & coadjutor Episcopi, & Capitulum Sede vacante.

---

[urn:nbn:de:hbz:466:1-74494](https://nbn-resolving.org/urn:nbn:de:hbz:466:1-74494)

liter Papæ permutationibus auctoritatem præbere non potest, uti nec Episcopus, de quo paulò pòst; nisi fortè specialis super his ei concessa esset à Papa facultas. Chok. *cit. n. 2. & 3.* Secus autem est in Legatis, qui non sunt Legati de latere, nec potestate Legatorum de latere pollent; hi enim, nisi fortè specialiter id iis concessum, permutationes beneficiorum auctorizare nequeunt; cum non habeant potestatem instituendi & destituendi in beneficiis suæ Provinciæ, Garc. *loc. cit. n. 61.* citans Gamb. *de potest. Legat. l. 5. tit. de permut.* Bellamer. &c. Vide dicta de utroque hoc genere Legatorum supra, ubi, an recipere possint resignationes alias.

4. Tertio, Prælati alii Episcopo inferiores, habentes ex consuetudine, vel privilegio jurisdictionem quasi Episcopalem, & Episcopis subjecti non sunt. Pirh. *ad tit. de ver. permut. n. 26.* Azor. *cit. g. 4. ad initium.* Castrop. *de simon. d. 3. p. 15. n. 5.* Chok. *loc. cit. c. 15. à n. 3.* (qui etiam n. 6. addit, id posse Abbates etiam non exemptos, ubi fortè jus illud auctorizandi permutationes præscriptione acquisierint) Garc. *loc. cit. n. 70.* citans Suar. *l. 4. de simon. c. 32. n. 11.* Gamb. & plures alios. Potestas enim interponendi auctoritatem in permutationibus beneficiorum competit Superiori ratione jurisdictionis Episcopalis, non ratione dignitatis. Pirh. *loc. cit.*

5. Quarto, etiam alii Episcopo inferiores, ad quos spectat collatio, & institutio talium beneficiorum, etsi careant de cetero jurisdictione quasi Episcopali, auctoritatem præstare possunt eorum permutationi, dum ex consuetudine legitime præscripta hanc potestatem approbandi permutationes (quæ de cetero spectato jure communi spectat solum jurisdictionem Episcopalem, aut qualem habentes) acquisierint. Pirh. *loc. cit. n. 26.* Castrop. *de simon. d. 3. p. 15. n. 6.* ubi: *Si Prælatus inferior habeat præscriptam consuetudinem, nemini dubium est, sufficere; cum ratione consuetudinis jus acquirat;* citat pro hoc Suar. *l. 4. de simon. c. 32. n. 11.* Less. *l. 2. c. 34. n. 196.* Rebuff. &c. Idem tradit Chok. *loc. cit. p. 1. c. 6. n. 2.* ubi: *Si agamus de consuetudine tanto tempore observata, quæ sufficiat ad præscriptionem, dubium non est, quin inferior jus illud acquirere possit, quale jus habent Inferiores ab Episcopo Leodii, qui quotidie permutationibus beneficiorum, quorum ipsi sunt Collatores, auctoritatem præstant.* Et sanè posse tales inferiores jus dictum auctorizandi permutationes præscribere, vel ex eo patet, quòd actus ille recipiendi permutationes non ad Ordinem, sed ad jurisdictionem Episcopalem spectet; ea autem, quæ sunt jurisdictionis, præscribi possunt. Chok. *loc. cit.* citans Rebuff. *ad reg. de infirm. resign. tit. de permut. n. 20.* Videnturque hæc procedere, etiam si tales inferiores destituti sint potestate destituendi in illis beneficiis. De quo vide dicta supra, ubi, an inferiores Episcopo recipere possint resignationes.

*Questio 849. Specialiter, quid quoad auctorizandas permutationes possit Vicarius Generalis, & Coadjutor Episcopi, & Capitulum Sede vacante, quorum tam hoc, quam illi videntur habere jurisdictionem Episcopalem?*

1. Respondeo primò: Vicarium id non posse, nisi ex speciali mandato Episcopi; quia in

permutatione interveniunt resignationis receptio & collatio, quorum neutrum potest Vicarius ille sine speciali commissione. Chok. *de permut. p. 1. c. 7. n. 1.* Pirh. *cit. n. 26.* Azor. *cit. g. 4. §. dubitatur.* Castrop. *de benef. d. 6. p. 3. §. 3. n. 3.* Garc. *p. 11. c. 4. n. 74.* cum communi. Neque sufficit, quòd habeat speciale mandatum conferendi beneficia spectantia ad collationem Episcopi. Pirh. Garc. *ll. cit.* uti nec sufficeret, si haberet speciale mandatum conferendi resignationes; quia ex hoc non posset conferre, quin & etiam si haberet potestatem destituendi. Vide hæc pluribus dicta supra, ubi, an resignationes recipere possit. Viderur tamen e contra sufficere, si haberet & potestatem recipiendi resignationes, & beneficia vacantia per resignationem simplicem conferendi. Quod si etiam haberet potestatem recipiendi resignationes ex causa permutationis factas, posse eum compermutantibus conferre beneficia, tradit Castrop. *loc. cit. n. 4.* contra Rebuff. & Barboff. eò quòd, licet ista duo distincta sint, sunt tamen omninò connexa; dum enim beneficium resignatur ex causa permutationis, eà conditione resignatur, ut permutanti concedatur, adeòque admittens resignationem admittat eo ipso conditionem: quomodo autem hanc conditionem potest admittere, si non possit illa beneficia conferre, nec collatorem ad ea conferenda obligare? Quælitur autem, ubi haberet facultatem auctorizandi permutationes, adhuc valeret permutatio ab eo auctorizata post mortem Episcopi, vel etiam post revocationem ejus factam ab Episcopo, vide apud Chok. *loc. cit. à num. 8.* & dicta à nobis supra *loc. cit.*

2. Respondeo secundò: Quid possit hac in parte Coadjutor Episcopi cum futura successione datus, facile deduces ex iis, quæ de hoc dicta sunt à nobis supra, ubi, an is recipere possit resignationes alias. Posse illum conferre beneficia, & recipere resignationes & permutationes, ubi coadjutus est demens; secus verò dum datus solum ob infirmitatem, vel senium, seu non posse eas expedire, nisi saltem cum consensu coadjuti, cum communi tradit Chok. *loc. cit. p. 1. c. 13. n. 5. & 6.* citans Paris. *l. 7. q. 20. n. 23.* Selv. *de benef. p. 2. q. 1. n. 8.* & plures alios; qui tamen plerique, etsi loquantur de receptione resignationum, ex paritate tamen rationis idem sentire videntur de resignatione permutationis gratiâ.

3. Respondeo tertio: Capitulum Sede vacante posse auctorizare permutationes, negant aliqui, affirmant alii. Vide hoc fusè à nobis decisum supra, ubi, an recipere possint resignationes. Vide etiam Garc. *loc. cit. n. 75.* Ventrigl. *To. 2. annot. 4. §. 2. n. 23. & 24.* Chok. *de permut. p. 1. c. 6.*

*Questio 850. Quid possit in hoc puncto Visitor, seu Administrator Ecclesiæ vacantis, datus ei à Papa?*

Respondeo: Potest is recipere & expedire resignationes & permutationes. Chok. *cit. c. 13. n. 7.* citans c. 15. *cui de elect. in 6. & c. fin. §. fin. de suppl. neglig. Prælator.*

\* \*

Quæ